

Kvalitetno finansijsko izvještavanje – katalizator rasta

Kreatori politika i eksperti se okupili na ministarskoj konferenciji

BEČ, 27. april 2016. – Ministri finansija, viši vladini zvaničnici i predstavnici poslovne, stručne i akademske zajednice iz cijele regije Evrope i centralne Azije su se, uz eksperte ključnih međunarodnih organizacija, okupili u Beču na ministarskoj konferenciji, koju svake druge godine organizira Centar za reformu finansijskog izvještavanja (CFRR)* Svjetske banke.

Glavna tema konferencije je bila uticaj kvalitete finansijskog izvještavanja na kataliziranje rasta investicija i ekonomija. Pozdravljajući oko 250 delegata na konferenciji putem video poruke, **Hans Jörg Schelling, austrijski ministar finansija**, je ponovio austrijsku podršku ovom programu: „*Nama je stalo do povoljnog ambijenta za rast i stabilnost u nama susjednim zemljama. Snažni sistemi korporativnog finansijskog izvještavanja doprinose rastu privatnog sektora, razvoju finansijskih tržišta, te time i finansijskoj stabilnosti*“.

Tokom panel diskusije na visokom nivou, ministri finansija Bosne i Hercegovine, Srbije i Kosova su razmatrali kako kvalitetno finansijsko izvještavanje može djelovati kao katalizator za povećanje povjerenja, transparentnosti i pouzdanosti – što zauzvrat širom regije stvara ambijent povoljan za održiv ekonomski rast, otvaranje radnih mjesta i razvoj. „*Bosna i Hercegovina je poduzela dodatne korake u smislu svoje opredijeljenosti za članstvo u EU podnošenjem aplikacije 15. februara 2015. Koordinirano usklađivanje njenih zakona o računovodstvu i reviziji s novim direktivama EU je značajan korak u pravcu pridruživanja i pružanja podrške za jačanje ekonomskog rast u zemlji*“, rekao je **Vjekoslav Bevanda, ministar finansija i trezora Bosne i Hercegovine**.

Naglašavajući značaj stvaranja prilika za rast i investicije u Evropi, **Katarína Mathernová, zamjenica generalnog direktora Generalne direkcije za susjedstvo i pregovore o proširenju u okviru Evropske komisije** je izjavila: „*Pouzdana finansijska izvještavanja i sistemi izvještavanja olakšavaju investitorima donošenje odluka i omogućavaju bolje kreiranje javne politike. Evropska komisija je spremna pružiti podršku za uspostavljanje ažurnih sistema finansijskog izvještavanja u partnerskim zemljama kako bi pomogla da stimuliše i promoviše konkurentnost i rast*“.

Cyril Muller, regionalni potpredsjednik Svjetske banke za regiju Evrope i centralne Azije je rekao učesnicima da finansijska i infrastruktura tržišta kapitala koja je usklađena s *acquis communautaire* omogućava lakšu trgovinu i ulaganja kapitala i smanjuje barijere između zemalja. „*Dubina tržišta kapitala pruža održivo okruženje za upravljanje i kontrolu rizika. Uz kontinuirano opredjeljenje, finansijske informacije imaju kapacitet za dalji razvoj kao vrijedan i značajan instrument koji doprinosi rastu širom regije*“, rekao je Muller.

Ovaj skup je pružio jedinstvenu priliku različitim korisnicima finansijskih informacija da razmotre uspješne primjere, kao i dalje aktivnosti potrebne za unaprjeđenje kvaliteta, pouzdanosti i raspoloživosti finansijskih informacija. Učesnici su razmatrali i ulogu reforme javnog računovodstva u promociji vladine transparentnosti i odgovornosti, upravljanja rizikom i inkluzivnog rasta.

„*Svjetska banka je zadovoljna što je s drugim ključnim partnerima uložila u uspostavljanje CFRR-a s ciljem da se posebna pažnja posveti kvalitetu finansijskih informacija i pružanju podrške zemljama na izgradnji povjerenja unaprjeđenjem transparentnosti subjekata od javnog interesa*“, rekla je **Samia Msadek, direktorica prakse globalne vladavine u Svjetskoj banci**, u svojim završnim napomenama na

konferenciji. „Iako još dosta toga treba učiniti, postignuća iz prethodnih godina potvrđuju snažnu opredijeljenost kreatora politika da djeluju proaktivno na ostvarivanju finansijske stabilnosti i dobrog poslovanja tržišta kapitala.“

Pored konferencije, održana su i još dva paralelna skupa. Prvi je **Radionica za više zvaničnike** koja je okupila predstavnike srednje, jugoistočne i istočne Evrope da bi razmatrali napredak na reformama i stečena iskustva u oblasti finansijskog izvještavanja. Istražili su i ključna zajednička pitanja i razmotrili uticaj finansijskog izvještavanja na ekonomski razvoj. Drugi je **Forum profesionalnih računovodstvenih organizacija** koji će 28. aprila okupiti preko 20 predstavnika koji će razmatrati kako njihova profesija može doprinijeti ekonomskom rastu.

*Skupovi su organizirani kao dio dva pod-regionalna programa:

- **Put ka Evropi: Program računovodstvene reforme i institucionalnog jačanja (EU - REPARIS)** se provodi u partnerstvu s Evropskom Unijom i Fondom za razvoj preduzeća i inovacije na zapadnom Balkanu (WB EDIF).
- **Jačanje revizije i izvještavanja u zemljama istočnog partnerstva (STAREP)** se implementira u partnerstvu sa: austrijskim Ministarstvom finansija; Austrijskom agencijom za razvoj; Evropskom Unijom, švicarskim Državnim sekretarijatom za ekonomske poslove; luksemburškim Ministarstvom finansija.

Saopštenje za medije

2016/ECA/126

Kontakti:

U Beču: Reinhard Haslinger, +43 (1) 2170-711, rhaslinger@worldbank.org

U Sarajevu: Jasmina Hadžić, +387 (33) 251-502, jhadzic@worldbank.org

U Washington-u: Elena Karaban, +1 (202) 473-9277, ekaraban@worldbank.org

Za više informacija o Centru za reformu finansijskog izvještavanja (CFRR) Svjetske banke, molimo posjetite www.worldbank.org/cfrr

Za više informacija o radu Svjetske banke u Evropi u nastanku i centralnoj Aziji, molimo posjetite: www.worldbank.org/eca

Za više informacija o Globalnim praksama za vladavinu Svjetske banke, molim posjetite: www.worldbank.org/en/topic/governance

Posjetite nas na Facebook-u: <https://www.facebook.com/WorldBankEuropeCentralAsia>

Informirajte se putem Twitter-a: <http://www.twitter.com/worldbank>

Za naš YouTube kanal: <http://www.youtube.com/worldbank>